

LA SCUVIERTE FATE DI UN GRUP DI ARCHEOLICS FURLANS

# Cjatade in Grece une necropoli micenee

Tes clevis des culinîs di Eghion sgjavadis fûr sepulturis antigonis di 3.500 agns indaûr e un prezios aventari di ceramicis decoradis di fin.

Une necropoli micenee doprade tacant plui o mancûl dal Diesimcuart secul p. di C. e je stade scuvierte di un grup di archeolics di Universitât di Udin dongje de citât greghe di Eghion, inte region de Acaia, intal Peloponês nordoccidentâl.

La scuvierte è je succedute di lunc de tierce campagne di sgjâfs che la equipe, vuידade de professore Elisabetta Borgna, e à puartât indevant intune mission archeologicje internazionâl inte localitât di Trapeza, une aree culinâr dongje di Eghion e pôc distant de marine sul Mâr di Corint.

Fin cumò a son stadis puartadis ae lûs dôs sepulturis dal gjenar "a cjamare" dal XII-XI secul p. di C., tant difondudis in ambit miceneu. Chestis tombis, sgjavadis intes clevis di culinîs, a son constituïdis di un coridôr di jentrade e di une cjamare

funerarie sgjavade intal cret. La scuvierte de necropoli e à permetût cun di plui di recuperâ un aventari prezios di vâs di ceramiche, decorâts in maniere fine e conservâts, scuasi in-



**Viude de aree archeologicje di Trapeza.**

fîrs, inte posizion là che a jerin stâts metûts jù.

Ae mission internazionâl, coordinade dal archeolic Andreas Vordos par

concession dal Ministeri grêc de Culture, al colabore ançe un team di ricercjadôrs dal Istitût archeologic gjermanic di Atene. Dut il projet al è sostignût de Institute for Aegean Prehistory di Philadelphia (Stâts Unîts) e dal Istitût Talian di Preistorie e Protostorie di Florence.

Lis ricercjis dai archeolics dal Ateneu furlan a àn permetût di cjatâ no dome che la necropoli micenee, ma ançe di capî la origjin dal cult celebrât su la cime de alture de Trapeza, un plan plac e regolâr, che al spiege il toponim "taule". Insom ae culine di fat si cjatân i rescj monumentâi di un grant templi dal 500 p. di C. plui o mancûl di dulâ che al ven un patrimoni prezios di sculturis riferibil ae citât achee di Rhyepes (nomenade di Pausania, scritôr e viazadôr dal Secont secul d. di C. e font preziose di



notiziis su art, topografie e miîts de antighe Grece).

Inte zone tacade al templi, i scandais stratigrafics fats dai ricercjadôrs udinês a àn documentât une lungje frecuentazion de alture, tacant de ocupazion dal Neolitic Final (fin dal IV mileni p. di C.) e in particolâr di lunc dai secui che a segnin la transizion tra etât dal bronç e etât storiche (Submiceneu-Protogeometric, XI-IX secul p. di C.). Cun di plui, la cjatade di ceramicis e manufats di bronç, ogjet di ufierte votive, e à dimostrât la esistence di un lûc di cult di etât geometriche (VIII sec. P. di C. plui o mancûl) vignût prin dal templi monumentâl.

"O savevin de esistence de necropoli micenee— e sclaris Borgna, docent di Archeologie egjee — di une serie di aventaris funeraris risultât di scuviertis casuâls di prime e di cual-

chi segnalazion presinte inte bibliografie archeologicje".

Cu la responsabilitât de ricercje di ambit preistoric, la Universitât di Udin e partecipe dal 2010 ai sgjâfs inte aree di Trapeza. I archeolics udinês si occupin, in particolâr, des olms di frecuentazion de etât tarde dal bronç che e à viodût disflorî in Egeu la civiltât micenee (XVII-XI sec. P. di C.). La squadre impegnade inte mission archeologicje in Grece e je formade di dottorants, laureâts e students dal dipartiment Storie e tutele dai bens culturâi dal Ateneu furlan e de Scuole interateneu di specializazion in Archeologie des universitâts di Udin, Triest e Vignesie. Il grup al è componût, in plui che di Elisabetta Borgna, Maria Emanuela Alberti, Francesca Ciroti, Gaspare De Angeli, Yannis Dimakis, Agata Licciardello e Giacomo Vinci.